

**Nunamut Namminermut, Pingortitamut Avatangiisinullu Naalakkersuisup  
Anthon Frederiksenip februarip 10-ani 2010-mi  
pijuartitsineq aallaavigalugu ineriartortitsineq  
pillugu isumasioqatigiinnermi oqalugiaataa**

*Avatangiisit tunngavigalugit pijuartitsinermik ineriartortitsineq*

Pijuartitsineq tunngavigalugu ineriartortitsineq Inuit Ataatigiit, Demokraatit aamma Kattusseqaatigiit Partiiata naalakkersuisoqatigiinni suleqatigiinnissamut isumaqatigiissutaanni tunngavigineqartuni tunngaviit ilagaa pingaartoq. Aammattaaq Naalakkersuisut anguniarpaat siunissami Inatsisartuni aalajangiinerit tamarmik avatangiisit pillugit nalilersuinernik ilaqartinneqartassat. Kalaallit Nunaanni inuiaqatigiinni ingerlataqarfiusuni immikkoortuni tamani ineriartortitsinermi pijuartitsineq aamma avatangiisinut mianerinnineq taamatuttaaq tunngavigineqartunut ilaassapput.

Nunamut Namminermut, Avatangiisinut Pinngortitamullu Naalakkersuisutut naalakkersuinikkut ingerlatsinermi akisussaaqataaffigaara Kalaallit Nunaata sulissutiguassagaa pijuartitsineq tunngavigalugu isumalluutit uumassuilinnik uumaatsunillu aqutsiffiunissaa atuffiunissaalu, peqatigisaanik qulakkeerlugu issittumi avatangiisit ajoqusernissanut mianernartut mianeralugit pijuartitsineq tunngavigalugu ineriartortitsinissaq.

Pijuartitsineq tunngavigalugu ineriartortitsineq Kalaallit Nunaanni pinngortitamik allannugtsaaliuneq pillugu inatsimmi maassakkut ilaatinneqareerpoq, taamatuttaaq Kalaallit Nunaanni avatangiisit pillugit peqqussummi pinngortitamik avatangiisinullu paarinninnissaq siunertarineqarpoq, taamaalilluni inuiaqatigiinni ineriartortitsineq pijuartitsineq tunngavigalugu inuit inuuniarnermi atugarissaat ataqqalugit kiisalu uumasut naasullu piguarneqarnissaat ingerlatsinermi tunngavigineqarluni.

Pijuartitsineq tunngavigalugu ingerlatsineq Kalaallit Nunaanni avatangiisinut peqqussummi allannuummut kingullermut ilanngullugu peqqussummi tunngaviusunut ilaatinneqalerpoq.

Siornatigut eqqakkanik suujunnaarsitsisarneq soqutigisatut sallerasimagaluartoq, massakkut taarsiullugu pingaartinneqarnepaavoq, akuutissat atortussiallu piunerat tamakkerlugu isiginiarneqarnissaat, isumalluutit killilimmik maangaannartinneqarnissaat siunertaralugu. Piussutsimik tunngavik tassaavoq nioqutissiap, nioqutissiarineqarnerata nalaani immikkoortuni tamani aamma piunerani atornerqarfiata allangornerit tamaasa avatangiisit pillugit nalilerneqartarnera, eqqakkanut iginneqarnissaata tungaanut.

Pijuartitsineq tunngavigalugu ingerlatsineq Kalaallit Nunaanni eqqagassat pillugit iliuusissatut pilersaarummi ilaatinneqarpoq, pilersaarummi aqutigalugu qulakkeerneqassalluni, suliniutinik aallartitsisoqassanngitsoq pinngortitamut aamma inuit inuuneranni atugassaritinneqartunut ajorseriaataasunik – nassakkut imaluunniit kinguaariinnut aggersunut. Pilersaarut anguniakkanik aalajangersimasunik ilaqarpoq isumalluutit annikinnerpaamik atuinissamik aamma atueqqittarnissamik tunngasunik. Anguniakkat taakku anguneqarnissanut ilaatigut suliniutissanik imaattunik siunnersuuteqartoqarpoq:

Nioqutissat immikkut toqqakkat pillugit nioqutissiortut eqqussuisullu akisussaanerisa atuutilersinneqarnissaat, eqqagassat annikillineqarnissaannut pinngortitamik eriaginninnissamut

akitsuutinik pilersitsineq, atuisut pissusilersornerisa allanngortinissaat siunertaralugu paasisitsiniaanernik aallartitsineq, assartuinermi poortuutissanik atuinerup annikillisinneqarnera, ataatsimut isigalugu pinngortitamik mianerinninnermik tunngaveqarluni pisiortornermi periuseqalernerup atuutilersinneqarnera il.il.

Naalackersuisut kissaatigaat piujuartitsineq tunngavigalugu ingerlatsinermi immikkoortunut allanut ilaatinneqalissasoq, taamaalillutillu ukiuni tulliuuttuni piujuartitsineq tunngavigalugu ineriartortitsinermit siunertat aalajangersimasut piviusorsiortullu ilanngunneqarnissaannut isiginninneq suliniuteqarnerlu annertusarneqassallutik. Suliap tamatuma ingerlannerani innuttaasut minnerunngitsumillu kommunit ilaatinneqarnissaat Naalackersuisunit pingaartinneqarpoq. Pilersaarut piviusunngortissagutsigu kingullertut taasat KANUKOKA-lu peqatigineqarnissaat pingaaruteqarput; pissutsillu aalajangersimasut pillugit oqaloqatiginnittoqalereerpoq.

Naalackersuisunit anguniagassatut aalajangersarneqareersutut assersuutitut taaneqarsinnaapput sanaartornermi nutaani tamani avatangiisitigut piujuartitsineq tunngavigalugu ingerlatsisoqarnissaa, Kalaallit Nunaani nukissiornermi immikkoortumi nukissiornermi avatangiisit mianeralugit ingerlatsineq tunngavigineqassasoq, kiisalu nukissiuutit taartaasinnaasut atorineqarnerat isiginiarneqarluni, CO2-mik aniatitsinerup annikillisinneqarnissaa tunngavigalugu assartuinermi ineriartortitsisoqassasoq, pisiarisartakkavut avatangiisitigut piujuartitsinermik pissasut, soorlu nioqqutissat avatangiisinik mianerinnilluni tunisassiarineqarnerat pillugu nalunaaqutsersukkat pisiarisarnerisigut, inuussutissarsiutitigut ineriartortitsinermi qitiutillugu isiginiarneqassasoq piujuartitsineq tunngavigineqartoq il.il.

Tamatuma saniatigut nukimmik, imermik isumalluutinillu atuinitta ataatsimut isigalugu annikillisinneqarnissaat kissaatigineqarpoq. Tamanna aalajangersimasumik sulissutigalugu suliniutitut aalajangersimasutut taaneqarsinnaavoq maannakkorpiaq suliffeqarfinni aalajangersimasuni arlalinni nukimmik atuinermit naatsorsuutinik suliaqartarnermut aallarniutaasumik suliniuteqarneq maanna ingerlanneqarmat. Naatsorsuutitut ilaapput innaallagissamik, imermik kiassarnermillu atuinermit naatsorsuinerit. Taamatut aallarniutaasumik suliaqarnermut atatillugu misilittagaalersut atorineqarsinnaapput kingusinnerusukkat naatsorsuutit annertusineqarnissaat kissaatigineqarpat, soorlu suliffeqarfinni avatangiisitigut pissutsit allat ilanngunneqarnissaannut; tamakku taaneqartarput avatangiisinik mianerinninnermit naatsorsuutit.

Avatangiisitigut pinngortitakkullu piujuartitsineq tunngavigalugu ineriartortitsinermit nunanik tamalaanik tigussaasumik suleqataanissaq Naalackersuisut aammattaaq annertuumik pingaartippaat. Nunanik allanik aatsaat suleqateqarnikkut massakut siunissamilu suliassat taamaattut aaqqiivigisinnaavavut. Ukiuni aggersuni suliniuteqarnissamat pingaarutilittut Issittumi Siunnersuisoqatigiinnik aamma Nunani Avannarlerni Ministerit Siunnersuisoqatigiivnik suleqateqarneq matumani taarusuppakka.

Naggataarutigalugu isumasioqatigiinneq manna ingerlanneqarsinnaammat nuannaarutigaa, piujuartitsinissarluni tunngavigalugu ineriartortitsinermit suli oqaloqatigiinnerup ingerlaqqinnissaa neriuutigaa, tamatumanittaaq avatangiisinut pinngortitamullu tunngasut ilanngullugit.

Qujanaq.